

天
真
閣
集

天真閣集卷五

詩五

昭文 孫原湘 子瀟

疆園協洽

春夜聽李山人味霞彈琴

飛觴嗚月苦不足東筵擗箏西按曲麗譙更鼓響咽綺席蠟
花搖敝敝坐中有客斂容起逸樂無終斯可已吳歛越謳請勿
喧聽我揮絃彈綠綺一彈天上春風回再彈春花都笑開此時
萬籟俱寂響銀河瀉入空堂來堂中客聞古音卧門外中郎幾
時過寧無人聽韜我琴慎勿改絃求知音

古梅花樹下作

春風滿天地萬物何所私偶從空山過遂發梅花枝人心自有
春不待花發時花香悅春氣如與春人期香在春風中我能知

其處求香香益遠遠香香自遇

連日昭明臺探梅

春風吹雪滿高臺放盡南枝北又開我爲暗香看不厭梅花儻亦愛人來

送鮑凌客之秦

酌君尙湖千頃之美酒娛君錦峰十丈之奇花故鄉此樂不易得問君何事行天涯去年送君弟正是梅花笛聲裏今年又送君梅花已落笛不聞丈夫意氣誠自豪安用局躋屠蓬蒿關中本是英雄地二千年土銷王氣芳草斜陽斷碣多待君一一爲之記君家巖父客中州十五年來雪滿頭君家慈母主門戶身上征衣爲兒補勸君立馬紫閣峰東望洛陽雲萬里勸君更上太華頂南望吳門萬重嶺山耶雲耶不可呼君今遠行胡爲乎

牽君馬爲君歌予亦乘舟將渡河安得常守南山阿男兒筋骨
行役老不如青青牖下草

同竹橋丈餞別王次嶽於城西酒樓

樓前春水昨朝生樓上看花樓下行湖氣逼天鷗夢短草香滿
地蝶身輕貧能閉戶原須福遊亦攜家總累情好景不愁難再
得青山終古住西城

邵元直登第後以親老乞改校官今春除寧國教授索

詩贈行

鄭虔骨相太清寒如此頭銜得且難民社幸逃充下考師儒休
說是閒官琴高水活宜烹鯉謝守亭空自采蘭將母課孫教弟
子一春忙殺杏花壇

鐵佛寺尋畫師翁芝

尋幽得晚步古寺夕陽邊人語出修竹桃花行亂泉情高死邱壑筆老活雲煙點罷天龍目春風抱佛眠

妾薄命

君恩湛如露妾顏嬌如花春芳裊餘潤跗萼流丹霞妾顏嬌如花
花妾命薄如葉微霜下庭柯古翠已蕭颯素月冷瑤砌清塵凝
象牀坐看敗葉飛迴風入昭陽覽鏡自徘徊紅顏豈殊昔美惡
在君心駐顏亦何益君如肯回照妾顏自長春願奉長門日終
畱報主身

羅敷行

白布可禦寒光不如羅綺桑葉可飼蠶色不如桃李使君變如
花自向邯鄲市羅敷自采桑蠶飢飢欲死何用下車來切切問
年齒君如天上月妾比溝中水月有照溝時水無上天理采桑

城南隅阡陌慎所指東家采柔桑不入西家里歸語使君婦應識羅敷旨

團扇歌

團團合歡扇皎若明月光明月無盈虧團扇無炎涼一朝秋風來棄捐笥篋裏月闕月復圓扇豈不復理牀上鴛鴦欄桁上翡翠裘當時未寒候一一空箱留萬物有代謝超然反其本寵何足悲專寵自招損

雞鳴曲

雄雞一聲天亦驚羣星在天不敢明地底陽精伏不得何況地上諸有情齊妃警哀公聽此蟲薨薨祖生語越石此聲非惡聲亦有馬蹄踏踏車轟轟市朝爭逐徒利名烏虜叫人出夢反入夢雞鳴不如雞勿鳴

征婦怨

荷鋤畏官去，荷戈虎符下。調征交河經，年不覩雲中。雁夜夜空，閨惡夢多。朝來慘報全，軍歿寸骨不歸歸。辮髮結髮，恩深翦紙。幡葬君遺髮，招君魂魄兮。莫怨沙場死，戰死沙場。勘餘罪東家阿父死，官糧官府下鄉械妻子。

隴頭水二首

隴頭水何潺潺，東流一去向長安。行人西行何時還。

隴頭水聲嗚咽，一半征夫淚，一半金創血。邊風莫吹此水乾，雷照歸時白骨寒。

憚蘭溪夫人畫冊二種

鄒小山侍郎配

枸杞

穠桃豔李多空卻，獨寫柔枝入粉紈。應取鄭風無折義，箇中頻

展畫圖看

稻

饑饉頻仍乙丙年江鄉何處覓紅蓮令人展卷猶增慨一石曾銷半萬錢

幽蘭

幽蘭處空谷香靜色自古努力春風中勿患衆草伍

囉噴曲

君植小桃樹臨行未作花花今能結子種核又生芽
喜得征人信開緘翻自疑平安兩字外無語及歸期
去日到襄陽書來自武昌夢中不識路只夢在家鄉
聞人與遠客一樣惜光陰儂自變年少郎自變黃金

古鏡詞

地中飛出秦時月二千餘年不曾闕久無人影落當中一片土
香秋作骨祖龍本是龍之精噴雲吐火鑄月成仙人無忌捧出
海却走魑魅奔蛟鯨曉開玉匣青天湛明星照見蛾眉澹祖龍
一笑入宮來宮女三千齊露膽重瞳一炬咸陽灰驪山美人白
骨堆金人十二化秋水神物獨得逃其裁可憐神物竟何用漆
鐙不返沙邱夢千秋金鑑是賢臣蒙恬蒙毅皆亡身趙高陰謀
李斯佐不照一奸膽立破

紀夢

削玉玲瓏指爪長十槩親勸九霞觴人閒久斷麒麟種卻被行
廚作脯香

我昔一篇寄馮仲廉

我昔騎白鳳西訪蓬萊宮瑤池清澈底照見雙青瞳下積百丈

泥重濁盤蛟龍土本是元氣載水浮洪濛采金鑄明鑑陰陽鍊
神功元精借銅質炯炯含當中從來至清氣攝以五濁躬聖神
照萬物飲食與人同

戰城南

朝戰城南暮死城北朔風蕭蕭白日爲黑耶孃望我歸妻子望
我衣鎬衣我肉臭腐飽飼饑鳶饑小弟走相訪戰死已前月但
見赤者血白者骨何處是我親兄沒青燐燐夜深聚滿地髑
髏作人語

君馬黃

君馬黃臣馬白君馬服天閑銜以黃金勒臣馬散原野無人爲
鞭策道逢九方皋相馬以繩尺臣馬七尺八尺逾其式呼馬而
告之曰爾相權奇不可以羈一息千里聖人騎爾獨往將安之

牆上難爲趨

入海可以騎虎登山可以乘魚海中有明月珠山上有連城瑜
戚戚促促胡爲乎利在安足全身軀朝爲人奴暮拜大夫白玉
飾砌黃金積除田竇堂上酒百壺一語不合相翦屠蓬蒿有窮
士跼蹐轅下駒耕我東山田閉我北郭廬路旁暗鬼紛擲揄笑
而不答全其愚君不見山無舟海無車牆上難爲趨

觀瀾行

我欲御飈輪入煙霄彎弓射落銀河潮力挽黃河注之星宿海
下視寰瀛四角如堂坳忽復大徹悟何處非波瀾滄海或爲田
人海何時乾但須放眼一縱觀翻手雲覆手雨天吳跳罔象舞
蒼黎爲魚萬萬古一沈一浮不知苦聖人赤手挽逆流不能使
鷗夷不假威於靈胥石雞不應響於陽侯銀山二十一時涌天

秋夜從味霞愛琴

秋夜靜太古開軒理素琴絃中繁商意指上流清音高峰亂石
墜幽澗縣泉深風動四山應松鳴萬壑陰雁窺平皋下猿挂危
枝吟暗雨走落葉飛霜散寒礎餘響隨白雲杳杳不可尋明月
在空中孤影靜不沈澹極空世味清到無秋心相看不能寐涼
露衣裳侵

悼表姪陳祖繩

爾我至親戚爾祖乃我舅我長爾五年視我若師友爾父年四
十爾祖已白首辛勤惟育爾今始十有九謂爾鮮兄弟早爲擇
嘉耦一朝遭惡疾竟使命不久爾祖哭爾衰况爾父與母痛惜
未冠婚不得爲宗後存者淚眼枯死者白骨朽

爾病早廢讀偶學簪籀能遂工鐵筆法愈小愈以精一石載百

字徑寸方縱橫老成各歎詫謂爾大聰明寒暑作不輟心力勞
兼并前月病消瘦刀石猶紛呈贈我青田凍細字多如蠅閉置
勿繙閱繙閱徒傷情

白哲頎然長圖中者誰子吾舅曰吾孫神非形畧似麋類及豐
頤丹脣而皓齒旣非不壽徵胡以遂不起父母見爾像銜痛入
骨髓親戚來登堂淚落不忍視呼爾爾不知譽爾爾不喜早莫
懸几旁徒亂人意耳是爾父母心念爾終不死安得人子心念
親常若此

牧歌

上牛坐伏牛卧牧童光陰牛背過牛尾秃速牛角彎牛肥牛瘠
心先關母呼兒飯兒不飯人餓須知飼牛晚放之平皋以寬牛
勞浴之清淺以息牛喘牛能養人識人意一牛全家命所寄阿

耶牽牛去輪租勸耶賣牛寧賣吾

養蠶曲

蠶喜靜密室簾櫳生客屏蠶喜煖深牕無風日華滿清晨采桑
珠露滴葉葉玉纖親拂拭不梳不沐一月忙紅蠶滿箔繭白黃
絲成許兒作布袴賣絲不穀充租賦貴家女兒不識蠶裁紈翦
綺終朝愁養蠶人家無寸帛七十老翁凍折骨

漁父詞

船頭鳴榔船尾槳阿翁下園婦牽網大魚小魚盈一船船底鄰
鄰活水養一生赤腳青溪邊白頭不知風浪顛全家託足本無
地衣食自在波中天得魚不論賤與貴換酒歸來供一醉移船
切莫近前溪今日官河亦征稅

樵唱

深林蒼蒼亂雨晴白雲前頭導我行斧聲丁丁隔谷應鳥雀無
聲樹頭聽低枝易斫多嬾條繁柯怒鬱盤青霄蒼崖勢作健鶻
上劈下仙人九節杖歸來踏歌山月高獨來獨往何陶陶芒屨
不踏縣城土聞道城中反多虎

詠古樂府

姑胥臺

臺下謀妾之君君之囚臺上遊妾之君君之讐登臺歌君恩多
妾有家在苧蘿下臺泣君謀急妾有家在吳國城門開越兵來
一炬火姑胥臺死者君存者君妾吳人妾越人

垓下歌

一帳無聲歌四面英雄美人色慘變重瞳泣下蛾眉啼紅珠彈
溼青天低王媵騅騅不逝王媵妾妾焉置寧爲鷓鴣膏劍鋒不

爲野雉隨他雄不見劉季妻孥數轉徙大度纔堪作天子

當熊立

一獸上殿萬人恐蛾眉如山屹不動昭儀憎慙婕妤寵今何怯
昔何勇問妾妾無辭中語前世事更何用知之永信官令史立
殺君之殺馮習今何勇昔何怯

燕飛來

五雜俎不夜珠往復來小犢車不得已詐上書五雜俎浴兒賜
往復來王盛計不得已定陶裔五雜俎綠綈底往復來于客子
不得已燕啄矢

丹青怨

不怨黃金賂不怨丹青媼黃金進身亦有命丹青只畫中人姿
後官多少良家子不嫁單于浪生死獨教萬里立奇功勝如恩

寵椒房中畫工自正欺罔律君王重信非重色

書鮑子淵秀才倅悲秋草

慟哭誠何益悲來不自知金人鉛是淚白帝鬢如絲月冀重生
魄花無復上枝同心有山鬼夜夜唱君詩

題畫雜詩得五六七言各一章

山翁折簡來待我雲深處呼童抱幽琴先過溪橋去
潑來淡墨無多寫出煙雲竹樹洞庭秋水蒼然七十二峰何處
萬古青山屹不搖山中流水去迢迢不如雲氣能來往時趁松
風過石橋

登舟

新月日俱落登舟野色昏波兼蘆作雨山併樹無痕小坐勝孤
夢殘書抵一尊鄉音聽漸別知過幾荒村

舟曉

曉眠疑過午急起日方升
水靜寒雲卷天高遠岫憑
櫂歌鄉語別市價客船增
飯罷渾無事篷窗且曲肱

龐山湖

別趨斜逕向松陵風物清幽得未曾
帆去健如新試僕山來熟似舊交
朋猩紅柏葉皆沿岸雪白鱸魚乍出
罾乘興還沽洞庭酒醉吟書破剡溪
藤

舟行雜詩

半日不聞柔艣聲舟人高臥看山橫
帆行南北風皆便天亦周旋似世情

煙樹前頭路不通石橋南望又推篷
舟行盡日百千折只在橙黃橘綠中

蘋花風緊艣聲遲正是鱸魚上市時小閣有人簾半卷畫眉橋

畔月如眉

東平望

寶帶橋頭秋水平鱸香亭下晚風輕片帆一霎九十里鶯脰湖
中看月明

小泊平望

邨墟如可卽極目已斜曛人語落秋水炊烟流紫雲近橋颿早
卸衝艇鴨先分且泊芙蓉渚餘香就水熏

戲詠枯荷十六韻

水落洞庭冷衆芳殊可憐枯荷誰折取短荻共蕭然遠渚翻層
浪中流接亂烟態緣擎雨改色爲飽霜蕩舞倦衣全卸妝殘鏡
不圓卽今秋瑟瑟轉憶夏田田莖起初張蓋圍寬欲勝錢承珠
效金掌瀉酒當銀船清影供魚戲輕陰護鳴眠花中眞作國水

底直無天節自經流火人皆罷采蓮飛蓬成藥鼓菱柳比沈郎
篋裏班姬扇江皋漢女鈿僅供鹽肆裹渺入藥鑪煎顛願心離
死清虛骨自仙明年汙泥底終讓出頭先

曉過寒山

舟行先鳥起反喚鳥夢醒霜華納窻白水氣襲衣冷山頭數遊
魚倒浸插天影雲起失前林萍開見孤嶺渚鴻何磬磬對我若
悲哽稻梁何足謀高飛碧天迴

霽溪

霽溪風物最清和燕尾雙橈畫碧羅桑地不姍栽麥計荻洲工
唱采菱歌人皆入畫描摹活僕亦能詩唱和多三日離家忘作
客推篷偏見月如蛾

新市

篷窗暝色悄烟凝小立船頭看月升
波落雁聲天際艣樹懸星影市梢
燈當風一網漁吹笛界水雙繩客
采菱此景宛符前夜
夢夢中原是少年曾

璉市

蓮塘波亂流孤客不勝愁
落葉扁舟雨疏碁獨夜秋
吳人多習水越女盡工謳
手把離騷卷蘼蕪滿綠洲

舟行玩月

舟行無定端一月忽左右我舟似逐月
月亦傍舟走戲掬一勺波嫦娥在人手
舉杯更相邀月又入杯酒一吸竟盡之
胸中且何有卻看玉兔逃宛然在溪口
追隨果不去永夜願相守

唐樓

一水環湫市烟重樹亦重
估樓人影火僧寺月明鐘
薄醉宜初

夜清寒夢早冬新霜滿前浦何處覓芙蓉

蛾眉山房訪汪次峯明經玉繩不值

幽居隱巖壑繞屋青芙蓉入門見修竹曲逕清陰通當軒蔭老樹晴日烟空濛嵐氣悅本性秀色忘寒冬山石聳犖斑剝疑青銅古拙得天趣不在空玲瓏主人愛獨往策杖知何峯白雲滿前谷可遇不可蹤出門發清嘯驚破雲重重回看蛾眉月已挂深林松

武林夜泊

獨醉領真趣孤舟天地寬水深惟見月秋盡不知寒風物餘清豔江山此大觀明朝理遊策客睡轉難安

孤山

高隱化窟去空餘放窟亭歸來定何日山色自青青一洗相如

累千秋處士星梅花三百樹一一是精靈

六一泉

看竹領幽趣竹深逢此泉蘇公能好事六一誌前賢勺水因人
貴空園得水傳古今同一慨我更慕坡仙

葛嶺

葛仙遊處有賈似
道半開堂舊址

葉落孤峯瘦登臨易夕陽高臺一憑眺塵世盡蒼茫青史蟲聲
關丹砂窈頂涼神仙非所願何問半閒堂

漪園

到此澹空翠白雲波底行小園隨水曲高閣與峯平落日見漁
釣滿湖流櫂聲我心如古井不起羨魚情

金沙港

踏輦西泠橋下塵煖風晴日小陽春天如翦葉能爲戲人道司

花信有神酒罷湖山看欲活詩成魚鳥聽如新歸舟恰蕩纖纖
月明鏡蛾眉掃未勻

蘇隄

聞道蘇隄柳年年黛色新春風吹一度愁殺畫眉人

蘇小小墳

段家橋外易斜曛芳草淒迷綠似裙弔罷岳王來弔汝勝他多
少達官墳

南北高峯雙翠壘畫眉想殺冢中人飛來一對花蝴蝶猶認湘
裙化後身

岳忠武墓

鄂王墳上樹蒼蒼嘯起悲風哭靖康宋室已收檀道濟朔方猶
畏郭汾陽朝廷自毀擎天柱宰相方開偃月堂千古奇冤成創

格不須烏盡便弓藏

當年直搗黃龍府重覩中原社稷新未必夷吾知辱國可能叔
武更稱臣兩難事竟無全理再造功成亦殺身五百射生唐盛
事奪門復辟又何人

題吳梅村集

麥秀蘄蘄四月寒著書祇分老江干龔生故里方持節江令新
朝已拜官東海生桑春爛漫西山采薇興闌珊彥回不肯中書
死脫屣妻孥事本難

幕府徵書取次催春風重上郭隗臺露霑天仗新池柳花落宮
衣舊井槐故友半爲袁粲死內人猶識沈郎來苦收金粉歸詩
筆抵得蘭成一賦哀

贈西谿老梅

羨君一隻孤山雀不出西湖五百年
和靖老諧新眷屬東坡親見小神仙
落花一尺厚於雪倒影半谿遮却天
我撫空枝不能去似曾相識幾生前

贈湖上友人

狂來痛哭醉來顛心在人間命在天
士則呼名多艾艾孝先捫腹自便便
相人月旦雙眸炯脫稟風行萬口傳
何事蒼生呼不起苦將經濟付林泉

別西湖

西泠渡口喚歸船水色烟光總可憐
賞盡湖山如讀畫載回風月不須錢
一番吟草詩爲路十日看花數定天
便擬重來人易老更堪難卜是何年

采菱詞

蘭溪塘接雪溪塘，家家種菱作秋糧。水深常防菱蒂沒，水淺又恐菱頭傷。種菱護菱不得暇，也似農田望禾稼。待得秋來菱實成，插竹作防坐終夜。蕩舟女兒工越謳，清晨采菱不梳頭。阿耶待菱易錢米，饑腸轉轉愁不愁。家中布機沒絲絡，身上單衣不堪著。儂家衣食在菱塘，雪白雙趺似菱角。日斜西風起，白蘋滿船紅角牽紫葳，東隣小姑共歡喜。門前正遇催租人。

寄題蛾眉山房贈別汪八次峯

其人與其室，皆足致相思。得意秋花醒，無言老石支。乾坤雙甕酒，日月一編詩。只恐蛾眉淺，終身不入時。

山塘雜詩

花市桃梅十月開，朱朱白白映妝臺。西風落葉聲如雨，不到美人心上來。

十三女兒學畫蛾
姍姍仙骨壓輕羅
不惜金錢買絃索
儂家生計在新歌

上樓壁月下樓花
花月叢中放妾家
猶恨垂楊顏色淺
何緣人世有桑麻

虎邱山塘

風吹秋夢落金閨
澹日微雲七里塘
貴客酒船都載妓
美人花市半窺郎
民風本自防廉恥
天意原頻警歲荒
底事豔情消不得
紫蘭偏采莫真孃

美人

生小鬱金香
盈盈入洞房
春愁雙蛺蝶
曉夢百鴛鴦
羣從金閨彥
諸兄粉署郎
阿儂夫婿賤
走筆賦長楊

吳趨吟十首

乾隆丁未初冬寓蘇臺匝月耳目所值著之詠歌仿
白傅秦中吟而稍變其體命曰吳趨吟所謂辭質而
徑事覈而實以備采風者之取信焉

蕩湖船

蕩湖船一生不出白公隄清晨泛月采香徑日午載花香水溪
四角紅絡索八扇青玻瓈中間畫簾捲銀押陳設玉爐金盃文
犀棋桐橋日落烟波膩放手輕搖疾於轡但聽雙橈畫水聲居
然走馬看花意狐裘蒙茸坐誰子白皙長身美髯紫當筵鼻息
千虹蜺一見美人心肯死美人家住桃花隄金鎖葳蕤閉朱戶
誰將小字說郎聞苦要移船就儂語樓頭飛落一片雲照水六
幅湘江裙郎飲同心杯妾歌同心曲一杯未竟一歌續沈醉不
妨船裏宿

當鑪女

十五十六娉媵姝春風吹酥玉雪膚門前繁花壓朱楯屋後竹石交綺疏鸚哥玲瓏喚人住石鼎松聲靄香霧畫眉妝罷膩春纖偷掠雲鬟理茶具何用別顏色霽紅定白哥窯青何用別香味虎邱龍井及鳳亭湯成細吹粥面聚點法別擅蘭膏馨銀船鑿落香一瓊直費中人半家產

女清音

豐容大辯誰家姝窄袖禿襟如子都小妹十三尙不足阿姊十六頗有餘客無生疏見面熟伎師催奉新聲曲曲終願客且斯須酒炙紛綸習池速探鈎射覆無不精承顏伺色尤聰明離之忽近卽之遠情無情處鈎人情睂眼能分客高下親疏還視金多寡常妝處女十年貞慣作乾兒一分假東頭客去西頭來貴

家夜宴還傳催明朝日高起梳洗妝成旋抱琵琶理昨日客來
今不來阿孃怒詈何曾已張燕燕李鶯鶯歷一處更一名門前
三日車馬稀一颿又向他州飛

名優伶

生不識布與粟膏梁文繡金珠玉生不識耕與犢樗蒲膈膊絲
竹肉雛喉宛轉學出聲嬌若處女清如鶯登場結束備袂態春
風一日馳歌名五陵年少誇游冶爭願結交致門下春花秋月
賞宴同人則連牀出連馬堂堂使者持節來高牙大纛城門開
太守除道迎中丞晉謁局促不自寧百官肅告退使者坐鬱甍
非兒優子各以雜劇進獨見此子大歡悅傳呼飭中厨咄嗟辦
果酒引吭發新聲按拍妍素手此曲京師未曾有吾願得子以
爲友明朝飭縣令爲製紫貂裘賜以款段馬綠袴眞珠鞵出門

導從滿街路馬前行人爭卻步故人相遇金閨門揮鞭掉頭不肯顧

賣花家

前花後花中非花五色璀璨如朝霞入門花光看不定鶯語玲瓏花外聽天家花事祇一春儂家花事四季新雪蕉疑懸摩詰畫翦綵訝出隋宮人先期爲珍後期寶開在當時轉如草卽將人面比桃花多見何如偶見好宣州白盆一種妍紅箋書價值十千朱門買花爭早得罕物不惜黃金錢種花種百本衣食自然生計穩種穀種一年剗肉補剗租不全種花人家肥種穀人家飢明年傭作種花家手提花籃去賣花一籃花值金一兩妓館遊船還倍賞

鬻女兒

生男不樂生女賀全家衣食賴奇貨十三教畫雙翠蛾十四絃
索調新歌十五天桃好時節桃花靨面光如雪阿母歡笑睂眼
開羣媒如蝶聞香來五陵貴客願求見門前立馬空徘徊鸚哥
頻催進茶熟隔戶香風透羅縠開簾銷鞞露雙鈎不動湘裙仍
六幅匆匆下拜玉釧鬆偷掠雲鬟指如玉日光一綫射睂間四
面紗窗紅映肉問年年可憐手指明月三五圓問名名若仙簪
花楷格書紅箋低頭私弄合歡帶迴身戲撥琵琶絃客喜語阿
母千金不爲多翡翠雙條脫明珠壓綺羅清晨與郎見日暮與
母別骨肉自東西何煩淚嗚咽阿母思女心開眼但見生黃金
女兒思母意上頭只見新珠翠

男工繡

銷繡纂組害女紅於今此事兼傷農終年荷鋤不得飽不如穿

鍼易見巧穿鍼勿學縫衣裳入時學繡雙鴛鴦垂髻男子十四
五列坐紅窗靜如女爲他人作嫁時衣素手偏工壓金縷繡袍
五尺春雲疊抖擻香風消百摺美人玉立稱腰身拖地長裾罩
華屨四圍蝴蝶珠穿成十戶中人衣一襲交龍鬥鳳色淺深聰
明費盡男兒心閨中一度春風著三月功夫弄繡鍼繡鍼眼無
一黍大賴此全家衣食過家中姊妹畫雙蛾妝成裏手終朝坐

新嫁娘

東家娶婦西家空巷南巷北花幡紅前頭笙歌喧兩部銷蓋如
雲從如雨鏤金錯采五十箱羅紈綺縠裁禪襦紫金步搖九雛
鳳白玉條脫雙文鴛小珠玫瑰色大珠明月光珊瑚寶石文犀
瑪瑙一一填中央光彩照里鄰奢華壓郡縣瞠目走僮奴交口
譽親串上堂翁媪大喜歡新婦下拜翁媪感感不安毋雞鳴起

毋供棗餠醢酒醴中饋米鹽不得屑屑勞爾爾自有鏤金錯
采五十箱開箱羅紈綺縠香紫釵玉釧十二行大珠小珠珊瑚
寶石文犀瑪瑙一一填中央

冶游女

吳山如黛螺吳女善畫雙翠蛾吳水如羅縠吳嬾慣拖湘裙幅
二月踏青至虎邱春風顛殺春雲羞桃花見儂學笑口楊柳見
儂學垂手燒香拜上觀音山采絲親繡觀音幡拔釵與郎祝富
貴脫環與郎祝平安五月龍舟早胥江水嬉好六月荷花香新
波蕩新妝中秋約伴湖心宴雪白玲瓏月一串一圍鏡裏一娉
娥箇箇團圓似儂面春亦不知愁秋亦不知愁上頭金珠翠壓
體綾羅綢東家新興百葉髻西家鬢作盤龍勢阿儂不隨女伴
來那得梳妝入時世

贗骨董

青天明月不可假其餘紛紛多贗者秦時銅鼎漢玉斝阿房宮
磚未央瓦戴嵩老牛韓幹馬紙墨所爲尤古雅山塘蓋閣對水
開清陰菽菽搖綠槐湘簾棊几位貼妥香爐茗盃紛安排千金
下至百金值索價無常視其客十日不得名一錢有時一錢遂
獲百塞天金銀氣夜半入官府大用買高爵小用買歌舞餘者
買此示好古不見世家舊物塵埃生玉罌汲水當瓦鎔沿街喚
遍無人買還付兒童去換錫

州塘

百里州塘路今無一丈完斷橋橫草臥碎石浸波寒問渡窮行
旅揚帆過達官催科限方迫力役且宜寬

近郭

羣鷗迎我鷁雙枝十里亭前落照時到處逢花忘客倦今宵有
月夢歸遲輕裝只載烏程酒短草新增白傅詩坐看虞山癡欲
問別來兩月可相思

歸震川先生墓

明時一代有歐陽白髮飄蕭六品郎七子騷壇空履迹八家文
字在心香入官妄意逢周召列傳終看次李王風雨黃昏茅舍
壁世間能得幾文長

靖難忠臣黃子澄墓

一區碧血恨難平首勸東宮議北征量錯安劉原大計條侯擊
楚要奇兵寇來定亂終無策爨起誅奸反借名謀國到頭成誤
國教人翻悔用書生

當年東角議逡巡唱罷瓜臺翦洛岷對壘忽頒蕭繹令重傷偏

狂宋襄仁月兒影落江湖小燕子高飛殿宇新洞闕金川門兩
扇問渠推轂是何人

訪太倉蕭百堂秀才

揆弟子山秀才掄魚墩小隱

魚墩繞屋樹扶疏大小何山稱隱居好友遍交吳越秀全家能
讀漢秦書醉來看得楓皆酒淡極唯應菊似予分手不勞申後
約吾儕多分老樵漁

長至日雨

冷雨紛飛入酒杯驚心令節暗相催直疑大地無乾土猶恐中
宵發凍雷五日前三三月不聞鶯鶯喜四郊誰念澤鴻哀問天此
是陽回日何事重陰駮不開

恩詔皇皇日下頒便應陽氣滿人寰窮簷又得輪租樂官府何
愁轉饜難添綫乍看勤翦尺無衣應有念刀環願天卷盡滄溟

水早放將軍破敵還

夜過西莊望次嶽故居

月黑城南野火光
隔隄烟樹認西莊
故人家在人何處
一夜相思夢洛陽

開倉謠

仲冬望日官開倉大戶小戶爭完糧
老者斃躄者或載或擔或負囊
朝報完不得斛夕報完不得斛
飢腸雷鳴寒起粟家在湖南與湖北
急持餅金賂吏胥一石願加三斗
輸吏胥睨目語今年官府清廉焉
用此羨餘城頭瑟瑟雨更鼓黑夜喧傳
叫糧戶官來前黠如鼠吏侍旁怒如虎
大家動斛用力舉狼藉不辨泥與土
尖如山落如雨一石米斛見五斗
五微聞旁人切切語今年官斛大於釜
少一升脫布絁少一斗衣質廬夫明歸家

見妻子猶幸遮寒存敗絮一炷香一尊醴拜天拜天但願明年
一晦收得六石七石米供給官府加八加九我亦喜

范叔行贈東叔還居釣渚渡

范叔隱君子混迹入縣城破屋祇一椽風雪愁欲傾著書仰屋
梁妻孥環嚶嚶破帽不裹頭索米繞市行昨日見青山忽動烟
波情晨興告我別將歸釣渚耕釣渚有故廬先子手經營棄去
六七載居守惟阿兄兄今復遠出蕪穢多榛荆少時花與木夢
寐時牽縈不如反蓬蒿尋我鷗鷺盟家具少于車載得輕舟輕
蕭然出城郭已覺心眼明雲樹若相識遙遙艣前迎渚烟何渺
渺渚水何澄泓市聲不到耳塵夢繇此清惟余增悵悵獨木空
嚶鳴明年雙燕來早爲開蓬衡

雪後同東叔子山登乾元宮晚眺時東叔將歸釣渚子

山歸婁東

雪後青山出幾人能一登撥雲開古磴踏葉碎層冰離思夕陽
暝高呼空谷麇何時結茅屋常此共扶藤

天真閣集卷五終

常熟劉光德局鐫

天真閣集卷六

詩六

昭文 孫原湘 子瀟

著雍涪灘

元日爲邵松阿舍人

齊熊壽

玉梅花下款柴荆扶出春風杖履輕
難得歲朝逢甲子恰當初
度降庚寅紅旗佇報祺氛滅黃道先開宿霧清
喜侍先生文筆健華顛矍鑠頌昇平

人日用高常侍寄杜拾遺韻簡吳竹橋丈

西莊春水生草堂惟公與予在故鄉
酒徒如雲各離散對此芳辰空斷腸
春風與人本無與一吹生人百千慮
卽今人日兩閒人他日題詩更何處
惟有西山青自春萬古不動無纖塵
故園歲歲花爭發醉把金卮得幾人

穀日雨

夜約探梅花晨起蕭蕭雨柴門閉露霏氣候變朝午溼雲低簷
榮苔蘚潤柱礎仰天滋嘅息詎爲芳約阻自從冬雨雪四野泥
斥鹵春陰爛麥苗萬物愛陽煦穀日雨妨穀會聞老農語頻年
水旱裁凍餓徧衡宇昨歲始有秋創孔未盡補願降屢豐年一
償老弱苦皇天果仁愛不待陽石舉急敕行雨龍滄海潛伏處
大放金烏光普照下方土胡爲雲冥冥陰寒失春序階前老梅
枝瘦蛟怒起舞

同松阿丈過邵雲巢上舍聖蘇家探梅

蝴蝶愛雙飛雙飛上客衣綵迴不忍去戀此香氣微昔遊羅浮
山夢見洛浦妃肌膚若冰雪咳唾生珠璣染我衫襖碧三月天
香翻玉靦在枝頭作花如霜肥東風吹我心先入雙瓊扉主人

出相笑晤對俱忘機

友人饜魚賦謝

美人湖上住寄我衍波箋酒勸丁年醉魚分丙穴鮮不勞張翰
計絕勝孟嘗賢風物江鄉好何時買薄田

城西早春同叔野子侶

東風作意釀春和吹綠池塘潑灑波殘雪園林梅萼小晚晴天
氣鳥聲多山城樓閣開圖畫燈市衣香錯綺羅只有月明塵不
染纖雲如埽鏡新磨

梅花下陶然獨醉

平生百無愛所愛月與梅月光待圓好一歲十二回梅花祇一
度可得一月開頻年爲遠客夢繞孤山隈幸月隨天涯不虛太
白杯歸來問南枝消息春風催探幽不辭遠踏溼行蒼苔輕煙

化爲陰護此玉一堆所惜月晦時姮娥閉妝臺問花花欲笑呼
月月不來天地有缺陷安得兩美該呼童問鄰家酌我新綠醅
醉時花下臥醒時且徘徊

琴師李味霞過訪同涉龔氏小園

春風幾時至吹我梅花開有客櫂孤艇手攜暗香來君旣帶香
來更欲尋香去出門無不宜逢香且須住流水莫相阻白雲自
可通行行不覺遠只在東城東入門幽以深取徑繚而曲此間
無俗情祇少數竿竹我請歌一曲君其張素琴爲我彈秋水一
清城市心

正月晦日同子和攜酒鈍閒齋餞別凌客

不因尊酒別而我已傷神誰使君爲客翻教主作賓梅花燈下
白楊柳笛中春天有畱人意開門雪滿身

送舍弟之浙

鴻雁滿春澤，扁舟何獨行。
帆飛寒食雨，花落武林城。
親老歸書急，家貧別慮輕。
相思似春草，處處爲君生。

項儒飲我

三月輕羅服，始成東風扶。
我踏新晴小橋，著屐人沽酒。
深巷吹簫，擔賣鷄黍，清貧偏好客。
鶯花爛漫，轉傷情漫圖醉飽。
尋春去，恐有郊原餓殍橫。

題江干泣別圖

一重江水一重山，山礙橫空水更彎。
此別前期縱難定，相思猶得在人間。

五嶽樓桃花歌

一日一日春風暖，一樹一樹桃花滿。
東家蝴蝶過西家，繡闥銀

牆渾不管好友相攜踏碧苔出門看花花自來流鶯玲瓏語高
樹花中若有人家住五尺花枝百尺樓花開翻在樓上頭乍看
人面不知遠轉徑忽迷吾欲愁春心搖搖綠波蕩隔門遙聞水
聲響滿路紅雲不見人白鶴中間自來往舉手招花花有聲春
風恰在花中行含葩斂萼一齊拆反照空山不成碧花枝含笑
我何思一半傷心一半癡青天又作濛濛雨說與桃花總不知

五嶽樓後看桃花歌

好夢不可一回醒好酒不嫌百回飲昨日花前醉似泥歸來夢
抱花枝寢戲將昨夢語諸公諸公之夢與我同人人意中有花
在出門撲面皆春風春風無形可撫倣又被吹人碧山上衡扉
兩板忽自開白雲如鶴迎人來舉頭花枝益爛漫低頭已見殘
花瓣一寸光陰一寸金登樓盡見羣花心何人攀條花下語蔽

蔽落紅亂如雨夕陽催人歸思生花中疑聞歎息聲重來縱使
開更好人與花俱一年老願借丹青爲寫真畫花更著看花人
人邪花邪總如夢各認花前見在身

西城

青山恰喜近城頭看盡人家屋裏樓小立桃花紅缺處有人剛
好上簾鉤

上巳修禊同頊儒筠樵叔野子侶暨雨兒

文杓文樾

春水冥冥一望空水邊香草正叢叢兒童歌舞聯新雨士女羣
裾襲晉風幾度芳遊堪作記更番勝友未嘗同三橋楊柳如相
識縮住扁舟不放東

花邊樓閣酒邊船俯仰乾坤又一年青帝繁華原徇俗玉人修
潔盡如仙茂林修竹巫公宅

巫公祠在廣山麓祀商相巫成

曲水流觴內史篇

我欲縱觀春氣象立身須到萬山巔

雲散青天客散邨惠風猶帶夕陽溫飄零祇惜花無命生死誰
如月有痕蝶認衣香偏識路鶯聽人語自知門獨憐古墓雙翁
仲竟日何人奠一尊

送筠樵北上

打疊春裝手亂翻離情更比柳絲繁尋常一樣登舟去曾有消
寬似此番

水程易盡驛程遲閱盡郵亭萬柳枝是我六年前去路煩君細
認壁間詩

送子和北行

桃花春水大江生一片傷心畫不成已分世人皆欲殺更堪我
輩獨鍾情去如風絮難爲主佳愛烟蘿亦爲名杯酒自乾先醉

夢忍看明月送君行

君去江南春黯黯黃金臺畔草芊芊夢中霜雪慈親鬢門內齋
鹽病婦肩縱有小星難替代况無舊雨爲周旋料應早入征人
計不得科名亦足傳

深柳聯吟圖爲長洲汪籍菴明經

廷楷

徐康亭秀才

賦

東風吹人詩思生不知何處宜詩情澹蕩不可著出門處
處聞啼鶯鶯聲玲瓏若穿樹直到垂楊最深處碧雲一片飛上
天總被桃花紅壓住好友相攜坐綠苔不尋佳句句自來春情
著紙欲飛去山花怒對心花開墨光淵然古苔色一點紅塵不
到筆詩成同聲拍手歌巧舌如簧盡羞澀不愁楊花滿路飛只
愁楊花點春衣春衣染盡柳汁綠追憶前歡不堪續君不見翰

林拾遺皆達官莫雲春樹徒漫漫平時尊酒不自覺別後相思難復難

春日邨居

邨南與邨北春盡在長條白鷺一天雪桃花萬里潮欲窮烟水趣何處木蘭橈應有楚漁父長歌如見招

重過龔園

記得探梅日寒香滿路聞已空一園雪如隔十年雲後至或鴻爪重來誰鶴羣臨風不能語飛絮正紛紛

隨園先生過訪并示新刻天台雁蕩遊卷

平生服膺祇有兩江左袁公江右蔣銜廬山瀑布鍾山雲一日胸中百來往昔年乘槎訪公家主人顏色如朝霞飲我七情美滿之旨酒說我五色顛倒之奇花醉中潑墨素壁上公呼美人

護以輕紅紗去年又訪隨園竹竹上題詩字皆綠主人放鶴未
還家我抱愁心共雲宿歸來還望雲之中思之思之夢見公身
如大明月手縮雙玉虹賜我仙人所鍊古冰雪洗我聰明消我
熱醒時雙烟凌紫霞三日爐中字不滅春風昨夜山花開先生
渡江果肯來青山低頭碧天笑人間有此人才東南奎星壁
星亮照我草堂屋角上事從喜極反致疑猶認梅花夢紙帳卻
思鉛山老編修騎鸞早向青天游獨留先生一枝筆乾坤秀氣
毫端收江山得助詩益長句裏江山更蒼莽赤城霞氣龍湫烟
一卷新詩指諸掌與公且登昭明臺願公且盡太白杯虞山得
公亦增價會看鼎足雁蕩兼天台

送康茂園先生

基田之江寧方伯任

先生當代之大儒奉使陳臬來三吳鐵冠白筆凜霜氣仁心自

與陽春俱南方豪俠滿郡縣鷹鷂猛鷲難勝誅先生曰吁是可
憫桁楊刀鋸徒摧膚下車問俗首文字清真雅正除繁蕪刑官
反負作人望法堂絳帳羅生徒和氣善導戾氣泯默轉豺虎爲
騶虞經術醞釀吏治古愛人學道言非誣歲終爰書計弊獄登
之天府 帝曰俞東南屏翰政治劇自江而上汝往敷士民
雜沓走相送甘棠召父歌郊衢吾鄉戴德尤感泣王喬舊日飛
雙鳧公來濁水盡轉碧公去白壁愁生汗願移雄藩更南鎮奸
民破膽窮民愉天生崧嶽必有意德澤豈判東西區會看汗漫
八埏外億萬赤子歌來蘇

哭內弟席子

世珙

穉子應無罪天心不可知竟拋多病母偏是幼孤兒豐碩成人
似聰明涉世宜阿兄素羸弱今更獨支持

淚爲亡兒盡因君淚更新那堪三日事命作百年身至戚真同
命庸醫竟殺人九原好甥甥相見倍應親

聞鄰家哭女盡哀感而作此

常怪人間慟哭聲黃泉無路得重生惟應孤子長號泣敢累良
朋責喪明一自二雛同物化遂教百慮總牽縈始知隔舍朝朝
淚未抵空齋默坐情

病目

寶鑑何曾屢照疲纖塵偏覺障琉璃平生空負如明月對面無
端似九疑在我聰明原不減任他睚眦總休知關心畢竟聽人
語又爲飛花怨別離

惜花歌

惜花枝花開曾幾時昨日花前歌緩緩今日落紅人不管惜花

人幾人知惜春惜花非爲花顏色惆悵芳時難再得花如不開
羯鼓催旣開又恐花全開開到枝頭全盛處便替花愁要辭樹
朝惜花初陽未及升朝霞莫惜花明月直到西簷斜春衣常教
香露溼對花無言背人立珍珠簾箔綃紗不護傾城卻護花
欲折一枝簪在鬢斂手幾回還不忍只道春花無老期春今未
老花先飛更無秀色照人眼空使餘香霑我衣蝴蝶聞香覓香
處飛上衣裳拂不去黃昏愁臥雨聲中猶夢繁香滿春樹惜花
枝花落枝已改惜花人心上花常在一年春色一年好一年春
人一年老對此空枝易斷腸重開不是此年光明明世事多如
夢爭不淒迷畧放長

月夜醉竹橋丈存吾春齋

新蟾欲出雲令我見之喜呼之入筵來照見尊中蠟月色洗我

夜花影隨我履几席播清光萬象在秋水月不勸我飲我自舞
月起尊中月已空我亦言歸矣

西莊觀水嬉遲舍弟不至

殘春久已綠忽覺桃花然山色不到眼水痕多可憐
曩驚何處浴楊柳昨朝妍有景道不盡憑欄思惠連

舟行觀落日

落日欲入湖綠波不能接下有一片雲如花託於葉雲勢欲吞
之氣薄難盡攝雲勢欲吐之天低若下壓半輪墮雲中紫翠紛
千疊散爲霞滿天光猶射人睫

首夏

浴蘭天氣日初長嫵綠如雲覆竹牀睡起滿庭紅雨落不知花
在膽瓶香

夜坐同頊儒

拔劍悲歌氣自豪
春風頭雪不勝搔
人間有地容青草
天上無根長碧桃
未屑老韓題合傳
可堪屈宋賦離騷
與君挑盡銀燈蕊
四海蒼茫片月高

唐聖馬驚菴

寺門青草比人長
過客低徊度缺牆
院已無僧誰放梵
殿空留佛不聞香
平橋轉徑通春水
古樹分枝漏夕陽
讀罷殘碑增感喟
廿年興廢小滄桑

曉寒

不坐綠陰中
渾忘四月終
雲濃低作雨
花老重垂風
卷幔茶烟入
添衣盡篋空
樹鴉啼莫苦
尙有四郊鴻

重午日哭阿安

去歲嬌兒在堂前笑語溫隨行黏艾虎繞膝捧蒲尊忽抱西河
痛難招楚水冤已防親淚落欲泣祇聲吞

與陳石泉上舍

稔精

登桃原澗過天龍菴小憩

乍出幽樹林俯視若深井松風足下來水聲壓我頂空翠本無
物澗溪蕩成影遙見亂雲根跳珠碎光炯幽陰衆壑聚雲外漏
返景花鳥雜覩聞心地轉虛靜無言坐磐石得意試佳茗石室
逢老僧冥居萬緣屏談笑不知春山中五月冷

出行

去歲我出行阿安牽衣語切切問何之送我跳且舞我行過溪
橋短立尙延佇歸來聞履聲急起快爭覩繞膝喚阿耶捧手進
糗粒扣以日課詩背誦了無苦今年不見兒至兒送我所回首
欲與言反身自扃戶獨去還獨歸顧影何踽踽開我東閣窗月

色暗淒楚風吹落葉來猶認兒步武遺挂已在壁嗒焉摧肝腑
竟兮若有知見我淚如雨

兕觥歸趙詩

前明吾鄉趙文毅公劾張江陵奪情受廷杖肉落盈
掌出都日庶子許國鑄兕觥以贈銘曰文羊一角其
理沈黜不惜剖心寧辭碎首黃流在中爲君子壽頌
陽生許國爲定宇館丈題趙傳門生黃端伯黃傳門
生陳潛夫兩公皆殉國難康熙間入何楚音家朱竹
垞爲賦兕觥歌後爲曲阜顏衡齋所得文毅五世孫
王楓乞翁覃溪詹事方綱作歸趙歌致書顏氏以玉
斝銀船易歸屬余詠其事

才大江陵相朝權肯付人奪情慙孝子抗疏賴名臣氣落同官

膽心孤去國身黃支珍一角豈但辟織塵

堂堂文毅節豈爲一杯加汗澤前朝重摩挲後輩誇可公天地物何必子孫家好事覃溪老新篇繼竹垞

于滄來明府

龍圖

介松阿丈索詩

冰箸銀河夜清風吹滿城于侯愛秋月詩思與之生長嘯碧天冷片雲頭上橫七條古溪水流作玉琴聲

仙山圖

世人未斷妻肉緣仰首碧落懷飛仙乘牛控鶴不可見握鉛提槩徒紛然亦有飄然寄深谷劇食黃精誇辟穀坐看白日沈樽桑歸來娶妻還食肉秦皇漢武御九寰富有四海無蓬山何如圖畫足寄意置身已在滄瀛間蓮華一峯插秋水下聽九州聲息死青天手弄白雲寒歷歷明星似蓮子

思悲翁

少年不愛生晚景乃怖死
逕欲乘輕舸去訪赤松子
遙遙三神山東海水瀾瀾
仙人不可期妄念猶未已
吹火鍊丹鉛黃金委泥滓
黃金去不來白髮鑷又起
如何八公衰顏色桃花似
吞聲赴黃泉終不悟元理

告阿安

生死原無準心存氣與存
舊衣如蛻骨空響卽游覓
飯供紅蓮美衾裁綠綺
温他時烝禴計爲汝定兒孫

未雨

未雨雷先到天邊勢欲傾
雲濃千樹失草綠一庭明
蟄物久應啓高原今始耕
但愁花落去何以慰蒼生

小雨

不期今日雨旣雨只如絲庭院暫生爽田疇安足滋天心久應
轉民力亦云疲願改驕淫習耕耘尙及時

泛舟華滙觀荷歸訪竹橋文

君知我來處衣帶藕花香雨露寧偏到池塘竟不荒地疑秋獨
占人在水何方快值幽棲近翻思道阻長

暑夜

夜深忘却下簾櫳六曲屏山面面風冰簟夢回清似水桔槔聲
在月明中

聞蟬

虛館全空萬籟聲高枝忽有一蟬鳴引將好夢沈沈去催得涼
秋漸漸生時序忽驚雙鬢改鄉園已覺百愁并尊鱸香裏天涯
客幾許西風古樹情

馮仲廉寓居東郭浦秀才署文家與吳頊范東叔金

以鄉居遷城戲爲作詩

我思鄉居樂復樂白雲爲城樹爲郭一室以外天地寬何似城中多束縛如何鄉居人反樂縣城土吳質遊南皮范冉僑三輔晨星聯絡居寓公有馮柱公嘗爲人語卜居意良苦鄉居不得好友見城居又隔青山面半城半郭水一灣吾願徜徉乎其間去年大旱河見底浦家門前水瀰瀰今年夏雨水漫隄浦家邊舍青瑯璃風輕日落打蘭槩非客尋公公則往魚家橋頭項儒所居榆樹陰青果巷口東叔所居蘆花深相邀共泛北山下烟水蒼茫何處尋

王參軍畫梅歌

參軍畫梅如畫人落筆先取梅之神初看離披不似畫意在畫

外藏其真一枝野而古潁水烟波隱巢父一枝清以羸孤山風
雪棲林道一枝秀無似苧蘿邨中西家子一枝澹絕倫西宮樓
上江采蘋最後一枝疏且活風姿非復人間骨除是偷看王母
家九疑仙人萼綠華想君下筆無定彙一枝一態隨意埽宜高
宜下宜淺深布置復各從其心請持紙上花去覓枝頭香枝頭
不香紙上香千秋絕技梅花王

昨夢

伏枕不能寐攬衣思其故昨夢煙霞人指我凌虛處恍惚芙蓉
花夷猶隔江樹江水數千里江雲自飛度已忘如何來焉知如
何去紙帳抱寒香海天秋月曙

雨夜發梁溪

尋常孤櫂發已苦雨兼風浪急驚欹枕燈消想漏篷况逢親老

日又別病愁中欲語同舟客鄉心恐未同

登報恩寺塔眺建業諸勝

高逼青天近西風八月寒南朝萬古迹此地一爲看臺上鳳飛
去江流龍怒蟠盛衰無限感落日更憑闌

十四夜

萬象澹於水秋光橫碧空一分圓尙未百里望應同世事浮雲
外詩情落葉中愁心與歸雁飛渡大江東

黃子久湖橋泛月圖

月閉一門水剝啄聲誰敲送來三尺畫煙水浮生綃西風吹我
心挂在湖樹梢我家樓上月忽墮尙湖橋

病中重九

愁對西風六枳籬登高有約已愆期身閒轉賴三秋病骨健惟

餘一卷詩鴻雁不來書恐誤鱸魚雖好客誰思小樓強倚闌干
曲紅樹青山是舊知

觀楓吾谷晚憩大石山房

人言寒山瘦我覺寒山清可憐霜後葉猶抱春花情山房石色
古蒼翠飛前楹感懷泉下骨寂寞存高名偶沽一尊酒得意聊
自傾浩歌入天風曲盡聞松聲不覺翠微外蒼蒼暝色橫

小湖田別墅

晚烟渺渺正愁予秋水溶溶直到廬紅樹有情遮小閣青山無
日避幽居稻香浮處看行鱉蘆雪搖時聽賣魚爲愛舉家圖畫
裏經年蹤蹟入城疏

煙波搖蕩屋如舟來往惟應數白鷗山氣逼雲潭作市湖聲含
雨欲吞秋羞將詩筆爭千古怕有才名出九州手種梅花三萬

樹不花時亦繞花游

家兄

原湖

以安義令卓薦入 覲還至京口水淺不得

進書促往晤誌喜

秋來夜夜燒紅燭爲盼音書不敢眠霜雁忽傳寒月下風鳥已
泊大江邊笑言睽隔猶千里手足拋離已十年相見何如莫相
別翻緣喜極淚潸然

送家兄回安義任

分手自茲去青山空夕陽西風墮黃葉憶爾下南康報 國心
偏切思親淚共長江天今夜月鴻雁自成行

讀乙巳年諸君子所題西莊草堂圖作悵然有感於昔

遊

桃花春水一葉舟興至便作西莊遊草堂主人工唱酬造物祕

景窮雕搜雕搜欲盡天亦惱才人筆花開正好天欲令人筆花
稿五月綠波風似埽西莊無水舟不通草堂之中賓客空西莊
無水山欲枯草堂之壁詩句無荒年米價高如玉一萬青錢兩
石穀蘆中窮士饑來驅冥鴻飛去湘江隅臨行苦戀神仙窟寫
得秋山秋水活盡錄吾曹唱和詩天涯到處誇風月人生交遊
能有幾動如參商幾千里烟雲竹樹本無情爲憶舊遊皆可喜
讀詩如讀書宛在蘼葭秋見詩如見人恍與王郎游王郎爾今
乃在洞庭之南瀟湘之浦還望故鄉夢修阻大好湖山棄如土
豈知有人方讀西莊詩嘆惜西莊風月今無主王郎何時拂衣
歸草堂爲我畫取洞庭烟雨連瀟湘

古別離和筠樵作

春江綠千里通妾門前水問水綠何時妾未知相思歡今起何

早衣裳何草草始知歡不畱始覺心悠悠送歡酒在手別歡淚
在酒酒滿尙不平水濶如何行春帆抑何遠春波抑何輒帆影
似離覓黯然波上痕

題錢黍谷副憲畫蘭

副憲名朝鼎

一叢瘦而勁新月娟娟若相映一叢疏而濶春風搖搖吹欲活
兩叢相對復相當美人鏡裏雙螺長四壁冉冉生幽香一簾春
夢流瀟湘何人妙手直如此吾邑彭城名御史御史蘭臺舊有
聲裏中諫草霜花起蛾眉謠詠鳥倦飛歸來靜掩東山扉時
放筆寫幽榦不怨孤芳知者希我聞蘭不伍衆草不是高人筆
灘埽粉本何須借楚騷自取平生作腹囊

竹橋丈屢過不值戲簡長句

何事神仙又入城閒雲悔向別山行故鄉會面猶相左隔歲知

心半遠征海國正聞勞轉饑湖田方喜熟新稅相期滿臥東山
裏恐有封軺迓伏生

王壘扇頭小景

淺深山翠活難分紅樹偏生礙夕曛看到層層青不了一層中
有一層雲

題蕭子山詞卷

抽黃對白嚼宮徵女郎所爲壯夫恥君獨胡爲亦工此旣不如
田舍翁家折券紙又不如兔園先生破冊子白頭閉戶擁鼻吟
饑腸韃轡寒粟起一字初出門百口紛摘指男兒立德不立名
安用尋常受譽毀而君霑霑殊自喜但願一人得知己得一知
己心亦死烏虜知已誠復難奈何求之秦七黃九間千秋詞人
應淚下鐵拍銅琵琶聲亦啞

書鮑子淵不作堂集後

鮑氏多才號五美四郎尤獨樹一壘不學王楊盧駱當時體嚼
徵含宮聽靡靡不學周程張朱談腐理顛倒無極太極裏貫穿
六經廿二史下筆往往似荀子其實自成一家耳有時縱橫太
自喜推倒一切獨有己黃金羈絡朱組纒祇縛駑駘非駟駟我
今讀君文大笑忽噓唏可以奉玉皇可以示竈婢不可以問天
下士日月雙輪疾如駛古來多少英雄人只向紅塵浪生死君
文工邪與拙邪天地茫茫問誰始

城西某氏購菊數百本張燈飾幔賓主嘈雜而花之清
瘦如故

秋報門西酒價增虹橋五色晚霞蒸
質無雅俗團團坐花有參差上下層
若爲避風張繡幙居然普月翦華鐙
東籬欲喚淵明

起如此繁華見未曾

松陵道中

楓冷吳江落照紅
季鷹曾此詠秋風
鱸香亭子依然在
不入春明客夢中

夢游黃山

黃山六六峯面面
削芙蓉倒挂一條水
分爲雙白龍
桃花杳然去
此地無人蹤
獨嘯碧天冷
秋雲暗幾重

張子和屬題平生游覽冊子

灑預放舟

石激水飛天地寒
孤舟直落青雲端
羨君二十年前事
奇險偏從膝下看

赤壁泛秋

秋光萬頃浴蟾蜍一葦橫江縱所如自是長公遺蹟重詞人何必問嘉魚

小孤雨泊

孤峯一點髻新妝四面雲帆到客航峯頂飛來數聲雨隨波先已下潯陽

銅陵聽楓

酒旗風裏片帆斜倒聽滄波響赤霞吾愛吾鄉吾谷好一秋飽看不離家

醫閭覽秀

我昔騎驢山海關往來飽看醫閭山十年隔絕幽州夢縮取燕雲尺幅間

黑窯登高

蕭然人海得閒身飽看西山日幾巡南望白雲千萬疊秋來應有倚闌人

太行立馬

上頭只有青天橫五嶽蓮花足底生山下只知高處好到來始覺下方平

上黨觀松

奇絕吾鄉破龍澗一株留得六朝松自從上黨題詩後不敢逢人說九龍

雪中同許穆堂丈吳頊儒泛舟詣竹橋丈素脩堂燕飲美人天上來邀我同輕舟舟行風雪中泛泛如白鷗勢急亂雲讓光炫明月愁回顧失丹嶺仰觀多玉樓杳如銀漢上但見清波流空長鳥影斷溪曲泉聲幽老屋隱修竹開門面平疇主人

玉堂彥高臥東山邱相思不相見敢效王子猷清尊且酌我秉燭同宵遊

把酒對知己不飲將如何此心若明月炯炯不可磨生懷安石志載酒東山過一爲蒼生起膏雨飛江河時來成大功事去歸巖阿銅章大如斗何似金叵羅醒者徒抑鬱醉得天之和今夕樂復樂美酒旨且多梅花爲我舞長松爲我歌大雪如高山照我醉顏酡開門見玉海直接銀河波我欲乘舟去因之訪姮娥

明季遺老顧麟士與其子湄隱居雙鳳鄉世稱織簾先生

生有齋中晚望詩云齋中薄暮望幽意偶相關牆短

放出樹烟深疑在山鳥低巢易穩人老地加閒與爾

干戈外拋書此破顏王翬爲寫詩意圖後有陳元孝

胡會恩俞思復朱彝尊姜宸英田雯題句竹橋丈出

示屬書其後

紙上殘山水飄零古淚痕
心肝無可奉骨肉且圖存
烽火連千里桃花自一邨
暮煙遮不盡老眼望乾坤
畫手高時輩能傳逸老心
干戈時事改喪亂道緣深
世外春如夢天涯日易沈
煙雲喜無恙舒卷到如今

梨雲仙境曲

輕雲冥冥生畫寒
空庭雪壓紅闌干
香颺吹人雙鬢影
古釵細顫青蟲冷
綃裳落翦湘波明
玉肌瘦貼秋烟輕
石扉靜鎖古苔綠
妝成自照天河清
天河洗花染白雲
花片不上仙人裙
碧紗如水繞蜂語
獨抱幽琴訴春雨
乘鸞素女烟無質
明姿肯落丹青筆
悔傳小字向人間
尋常猜作文簫匹
屏山選夢瑤情空
清寬蕩漾明月中
肉臚悵望洞天碧
桐花一樹搖天風

佩珠仙人歌

翠葉埽空秋欲雨一人手攀碧雲語明眸射天星寒雨點匡廬在眉嫵海中仙人八百家燕支照水皆桃花翩然翠袖背花立吹氣自作清空霞長虹爲繚月爲佩至情包裹珠胎內珠月分明出海波海水能枯珠不碎珠光圓轉墮我懷珠樹蔽蔽瑤花開散花滿身珠在掌萬年跌坐青蓮臺

獨坐

長嘯碧雲破四時天地秋風來篔簹自語琴罷水空流心與月明冷坐知山意幽梅花凍高閣隨處一羅浮

江陰陶秀才乞題補梅圖

不放孤山月色孤手攜鴉嘴作花奴勞君二十三峯裏一箇峯頭補一株

三十三峯似雲一峯一樹雪紛紛不知今夜澄江月何處峯頭好著君

陳木齋先生

守創

爲常熟令時繪意有餘圖先生去而

圖存吾邑某氏瞻仰之餘敬題此詩

天地以有餘高厚成山川日月以有餘奇偶成歲年公才妙天下本非百里賢達人志濟物小試於割鮮吾鄉文學地藻采徒翩翩公來返淳樸教以農桑先吠聲息宵警慶色增人烟民和感天時豐稔盈陌阡棉布餘飛花香稻餘紅蓮織裳爲公壽釀酒陳公筵清心一無取自酌琴溪泉訟庭無人時虞山揖堂前高巖有瀑布洞脇風雲穿流者爲長渠凝者爲重淵皆公澤所化霑溉及百廛公也坐彈琴松風入秋絃恢恢若游刃縱目無牛全披圖發深慕未得親陶甄雙鳧久仙去破畫珍流傳聊當

桐鄉民歌祝迎神虔

畫梅贈倪閒谷布衣

賜

蕭然身外賸詩名直與梅花一樣清
借問語溪老詞客幾生修得到今生

陳宮詞

膝上看封事牀前進踏歌青天明月破飛下一姮娥
豔體金箋擘新聲玉腕裁後庭誇贈答霸業是詩才
倉黃下殿走無計避臨春拋却江山好思量美人
獨足高臺險連軀井水深竟違同穴願天子本無心

戲銘拳石硯

媯皇補天五色破碎遺此一卷希奇古怪問年幾何默而不對

貧女

綫帖鍼箱鎮日依爲他人製嫁時衣苦心繡出鴛鴦譜又怪鴛鴦不並飛

夢遊羅浮曲

萬花圍住春人眠詩夢只落梅花邊雲邪水邪不知處茫茫香海連青天中有綽約飛天仙風吹縞袂如輕烟遙看冉冉出花下卽之已在羅浮巔羅浮四百三十峯峯雪上留仙蹤瑤臺尋遍佩聲杳回身花裏偏相逢手拈花枝語不發暗香吹來入人骨嫣然一笑春滿山四百峯頭盡如活尋香蝴蝶身帶香彩霞爲服花爲糧飛上仙衣拂不去仙人識得狂生狂逕欲乘之去闐闐素娥青女相酬答瞳神翦水射春星下視麻姑鬢蕭颯忽逢雲中萼綠華冰霓化作雙瓊葩烟姿玉骨兩絕世碧桃羞澀千年花一聲仙笛秋筠裂吹落天花滿身雪醒來但覺徹骨

寒手抱如盤古明月

惲壽平秋海棠菊花小幅

同是秋花得氣遲冷香未許蜨蜂知天生一種蕭疎致多在哀
蟬落葉時

碧空吟

默坐看天忽大笑碧空誰造芙蓉城城中主者石曼卿何年雲
車風馬來相迎或云三閭本水星太白原金精世間才人死天
上仙人坐生仙人有生若無死仙宮塞破白玉京太虛無物本至
清何年烏兔雙丸明但看瓊瓊走圓轉不聞聲在空中行后羿
射九日何以天不傾羿妻奔入月何不射月爭漢時博望侯銀
河去吹笙襄歸一片石誇示嚴君平自從天宮失此寶七襄織
錦何由成織女云是天帝甥何不大索驅天兵明星如明珠一

縷穿縱橫萬年布子永不更何人板板鋪棋枰眼前疑實了不
解何況天外三十六天一誰能評

書杓兒哭弟阿安詩後

天不興衰族春風奪我兒一生真短夢五歲早工詩留得芝蘭
種應添棟樑詞殘年燈火下涕泗又交頤

屠維作噩

人日過子侃

出門動卽到君家小閣簾櫳易日斜故事正宜挑菜甲新年且
共對梅花雞栖豚柵安生計燕語鶯啼感歲華一角青山春秀
發不曾低首白雲遮

以酒告阿安

手把醪酥酒停杯忽愴神忍言兒是鬼驚聽日逢人不誤投胎

早如知入夢頻雙棺對梅樹玉骨定前身

初九夜夢阿安

渺渺黃泉路遨遊只在家身騎蝴蝶翅手折蕙蘭芽服食三危
露衣裳五色霞靈光似明月一笑索梅花

初十是阿安生辰

去歲縣弧日依依膝下身聰明真勝我長大必成人誤藥難歸
命傷慈總爲貧當時早憐惜徒此淚霑巾
傷心生已隔猶說是生辰湯餅從新奠犀錢似昔陳敢邀天壽
鬼直以汝爲人認得鴛衾夢幽覓化石麟

初十夜復夢阿安

尋常猶見汝今日况生辰春氣多成夢悲思更入神乍疑向何
處翻道死非真此卽金環兆重生定夙因

飲竹橋丈齋中卽席贈黃小迂孝廉鵬驥時小迂將赴

計偕自郡中來別

新年招飲故人家開五辛盤剪韭芽簷月澹流雲母箔爐香清
出水仙花乍逢今雨同心蹟未覺春風改鬢華祇恐盛筵終易
散當時賓客半天涯謂元直雲上壽君子和筠樵諸公

拋却五松園裏月春風春水孝廉船好將名勝誇天下定許聲
華重日邊經濟本從泉石起文章終屬廟堂傳荆花葵謝方爭
惜珥筆蘭臺繼二賢謂哲兄侍御殿撰兩公

上元燈事

紫鳳銜珠翠玉蟠千枝鱗比六街寬逼天氣燄雪多讓徹地歡
聲月不寒盡說扣門求火易誰憐鑿壁借光難如何十戶中人
產只憚豪家一晌看

曉雨

薄霧忽成雨春光杳若沈濛濛
烟樹裏愁殺是啼禽已阻梅花
約因之懷素心麥苗真大好還恐又春陰

新晴

春夢未分明春禽已亂鳴
晴光簾額動香氣被池清
便擬探梅去何辭踏溼行
故人先我意隔竹扣柴荆

春夜同道華

湘竹簾鋪淺浪紋銀鉤挂起水沈熏
斷腸春色消魂語梅放三分月二分

大婢添香小婢歌水如天上月如波
忍將一刻千金夜付與華胥夢裏過

小東風起玉鉤敲卻下重簾護燕巢
私語碧紗窗底月爲儂移

上杏花梢

花朝對梅憶阿安

去年今日病歡賞待明年至性花爲命無情玉化烟畫圖難寫
骨裳佩祇聞仙縹緲靈光在幽香若爲傳
生香真似汝不斷戀予心泣下瓊瑰淚消之綠綺琴返魂熏寶
鳴入夢託仙禽雨色風吹過飛花受滿襟

春早獨行邨落數里而返

獨自幽尋興轉饒一襟清露曉寒消溪多乳鴨邨知近岸有桃
花路不遙一徑入烟疑忽斷數峯隔水若相招欲窮百折千回
處更逐閒雲過小橋

登樓

春風無意響簾鉤燕子知人欲上樓衝得碧桃花數片一雙飛

過粉牆頭

將爲阿安阿六卜葬祖塋之側告之以詩

徒益高堂痛空房閉兩棺精寬如有識骸骨定求安况得祖宗
護仍爲兄弟歡從今離故宅訣絕更辛酸

葬畢再告

到此全歸命茫茫骨肉情岡陵同一死土壤冀重生季札原知
禮西河已喪明歸途重延佇疑汝未隨行

春盡日亡兒墓下作

玉雪雙兄弟青山共卜藏有寬依祖父無夢告耶孃草苗紅心
秀花埋玉樹香紙錢飛滿地泉路買春光

陽春如有腳可得到重泉蝴蝶原爲夢桃花只似烟寬歸能識
父骨在定飛仙又見靈芝草森森長玉田

哭鮑子淵

戲語相期駕玉螭青天竟有召君時一家文筆尤稱健二十功名已恨遲賢母早防心嘔血才人原少鬢如絲中郎書籍憑誰管未賦催妝卻扇詩

跋扈飛揚太絕羣青霞奇氣鬱難分詩成脫手先呈我論屈低頭最感君宿草豈能收一慟筆花還望發孤墳賈生遺策光芒在地下應須見漢文

君有致治論
纍纍數千言

片紙家書色死灰驚魂先已赴泉臺糜身莫挽終天恨病骨猶支七日哀變禮丁寧衰服斂臨終望斷玉棺回可憐點漆雙眸子更爲偏親炯炯開

君方得尊甫歿
於中州消息

骨葬人間種不存苦留玉貌對金昆添毫能借長康手翦紙難招正則竟鬼錄可容追及第父書應與覓幽婚願君再世爲人

去只向閻羅乞鈍根

題筠樵南旋紀程詩後

黃金臺北起秋聲行卷蕭然紀客程尺五青天一搔首男兒三十以詩名

題鮑子淵遺藁

吾友鮑子淵獨立自歌嘯正聲久微茫戛戛彈古調跬步不出門萬里若身到如月行空中宇宙豈疲照奇才太縱橫鑿破混沌竅鬼神怒雕鑿陰使精力耗一試不得意呼天發狂叫湘纍賦秋辭無理愈超妙怪鵬初下簷青蠅遽來弓遺書墜秋煙孰爲扶幽曜花前一回讀花各怒而笑獨步夕陽時嘒嘒羣蟬噪

九月晦日壬子余婦夜夢阿安曳其右袂醒而誕一女疎睂秀目宛然兒也計兒亡日亦以壬子咸謂兒再

來矣夫死生夢幻之境儒者不道然折其方長則勾
萌復達一氣之所化理或宜然夫子不云乎未知生
焉知死謂是其再來與吾鳥乎知之謂非其再來與
吾鳥乎知之

銷紉初脫聽啼聲嘖嘖爭看築玉成留得前生睂目在愁他女
子又聰明

新樹枝原舊樹枝妄言姑以妄聽之料應誤記金環在不作男
兒作女兒

天眞閣集卷六終